

mai ia i ko kakou noho ana. Ua pau keia manao.

N. Ua pau anei hou manao? Aole hiki ia oe ke hoakaka hou mai na mea e pono ai? Aloha ino!

M. E hiki no paha. Ke manao nui au e kakau, ma ka pepa i keia mau mea a kua i kamailio ai, a e hoouna aku ia Mi Tineka. Ina manao ia he mea paha keia olelo e pono ai kanaka, nana ia e pai. Alaila, e hoakaka aku ai au i ka waiwai o ka manawa. E hoopomaikai mai ke Akua ia kua, a me ke Alii nui nona ka aina—a me ka poe makaainana a pau loa. Amene. Aloha oe.

N. E hoopaa mai ke Akua i kau olelo iloko o ko'u naau i ola pu kua a me kanaka a pau loa ia Iesu. Aloha no paha.

### KAHI MELE.



### HE KANIKAU NO KAAHUMANU.

Mihalanaau i kuakahi ka newa'na,  
Ke kaha'na ka leina aku nei liuliu,  
Liua paia aku nei i kuanalia,  
I analipo i analio.  
Lilo aku la i ka paiaakuakane,  
I ke ala muku maawe ula Kanaloa,  
Keehi kulani aku la ka hele ana,  
E Malolokihakahakuleiohua,  
Ke'lii i kuluhiolani aui newa aku nei,  
I lele aku na i ke kahi ana o ka pawa,  
I ke anohia kohikohi an'o ka po,  
Ka lilo anc', ia;

iala, o—i—e.

Oia hoi, he uwe, he aloha ia oe, a—  
A aloha liua lio paiauma ka manawa,  
Pakoni hui ke aloha loku i ke ake,  
Wehe wahi ka pilipaa o ka houpou,  
Naha ka paa, ka pea kua o ke kanaka,  
Helelei, hiolo ka pua o ka waimaka,  
Lele leio, lio loko i ka mihi,  
Mihi o ke alohi o kuu haku maoli,  
A kaawale okoa ia'loha ana,  
Aloha aku o ke aloha hoahanau,  
Aole he hoahanau ponoi no'u,  
He hanauna ku okoa iloi'ka Haku,  
I hanauia e ka Uhane Hemolele,  
E ka Makua hookahi o makou,  
I pilikana ilaila e wena aku ai,  
Ilina inoa kaikuwahine no'u,  
Auwe no hoi kuu kaikuwahine,  
Kuu hoa hooikaika'ka luhi leo e, ia,

iala, o—i—e.

Oia no o oe ke aloha, ka u a'loko a,  
A, aloha oe ka hakukau o ka manao,  
Ke kookoo'ka leo e ili aku ai,  
E imi pu ai o ka waiwai ka pono e, ia,  
iala, o—i—e

O ka wahine ale ua wahine e Kona,  
Nihii makani ale ua, kukalahale,  
Noho ana kua wela ia o Pahu,  
Wahine holo ua hooa nana e, ia,  
Holo a nele i ka pono, ua pono,  
Ua hiki aku hiki mai, ke aloha ole,  
Aole pono, he enemi noho pu e, ia.  
Aha, aia'ku la i he lani,  
Ka Uhane a ke kino wailua,  
Kinoakalau pahaohao,  
Oiwii haona hiona e,  
Hailiaka, kino ano lani,  
Hea anel'o ka lani ma,  
Ke luana wale la i ka lani,  
Ua luhaka ka noho ana,  
Ke halelu ia la ilaila,  
Iloko o ka paredaiso nani,  
I ke ao mau loa o ka Haku e, ia.  
O ko kakou mau Haku no ia.  
O ka Haku mau no ia, oia no,  
O ka manao ia loko e ake nei,  
E ake aku nei e, e.

LAHAINALUNA, MEI 22, 1834.

DAVIDA MALO.

### NO KEKAHI HANA MA KA LA SABATI.

E hoolohe mai oukou i kekahi mau mea e hana'i ma ka la Sabati.

O ka hooakoakoa ana ma ka luakini e hoomana aku i ke Akua. I mai la ke Akua ma ka Oihana kahuna 23. 3-penei. "Eono la e hanaia'i i ka hana, aka, o ka hiku o ka la, oia ka Sabati no ka hoomaha ana, a no ka halawai hemolele ana." Oia ka ke Akua olelo.

Ua akaka ma ia olelo, o ka halawai ana oia no kekahi hana pono ma ka la Sabati. Pehea la ka pono o ka halawai?

Eia no ka pono. E pule e mamua o ka halawai ana—e pule ma kahi mehameha, i makaukau oukou, i pau ka manao pono ole, ka manao no ke kino a me na mea lapuwale, i paa hoi ka manao ma ke Akua, ma Iesu, a me ka Uhane Hemolele, a me ka ke Akua olelo, a ma na mea e pono ai ka Uhane, a i lohe pono hoi ka pepeiao i ka mea i hoakakaia'ku e ke kumu, a e pule hoi i iho mai ka Uhane e noho mai maloko o ko oukou naau, a maloko hoi o ka luakini e wehewehe ae i ka naau o na kanaka i ike lakou i ka nui o ko lakou hewa a i weliweli hoi lakou no ka lehulehu o ko lakou kina, a i mihi io no hoi lakou i ko lakou hewa, me ka haalele a me ka hoopailua, i lilo ae lakou i poe pono, i poe malama i ke Akua, i poe paulele ia Iesu ka mea e ola'i.

E pule no hoi i mahua'ua'e ka pono a i hiki wawe mai ke aupuni o Kristo ma kela wahi ma keia wahi, ma na wahi a pau ma ka honua nei. Pela oukou e pule e ai mamua o ka halawai—a pau ka pule ma kahi mehameha e hele kuoo oukou i ka luakini Iehova. Mai hele mama—me ka manao ole a me ka aka-

aka a me ka lilo ana i ka pono ole—e hele pololei, me ka haipule a me ka makaala, e hele hoi me ka hoomanao ana ia Iesu i kona make ana, a i kona alahou ana, i kona aloha, a i kona makemake. A e hele no hoi me ka makau i ke Akua nona keia la. Pela oukou e hele ai i ka hale pule a pau oukou i ke komo, iloko o ka luakini alaila e hoomanao oukou, aia no oukou e noho ana maloko o ko ke Akua hale he wahi eehia he wahi weliweli—he wahi hoi e hoomanao aku ai ia Iehova me ka naau pono. Ua kukuluia, e keia hale nona iho. Eia no kona wahi e noho ai ma ka la Sabati, nolaila e pono no ia oukou ke noho malie, me ka walaau ole, a me ke kamailio ole—no ka mea, eia no ke Akua maoli, ke alii nui o ke lani a me ka honua, nona ka mana a me ka ihihi a me ka hoonani mau loa ia. Nolaila e hamau oukou a e hoomana'ku ia ia me ka makau a me ka haalulu. L. L.

### NO NA MOKU.



### O KA HOLO MAI.

Sep. 30. Cheviot, Bateman, Ladana, 14 mal. 450 bar.

Oct. 3. Samuel Enderby, Lysle, Ladana, 12 mal. 600 bar.

5. Tuscan, Stavers, Ladana, 1700 bar.

7. Elbe, Whippey, Pokepesi, 26 mal. 900 bar.

7. Luminary, Gardner, Warena, 34, 1, 250.

12. Audley Clark, Paddock, Nupota, 22. 800.

### O KA HOLO AKU.

Oct. 5. Adaline, Buckley i Iapana.

5. Unity, Shaw, Kalifonia.

12. Audley Clark, Paddock,

14. Midas, Spooner,

16. Vineyard, Tobey, i Amerika Huipua.

### O KA HOKU WELOWELO.

Ua hiki mai kekahi hoku welowelo i na la 13, 14, 15, 16, o keia malama Okatoba. He hoku kau-lana no ia. Ua ikeia mamua e ka poe kahiko i na makahiki o ka Haku 1456, 1531 1607, 1682, 1759.

I na makahiki kanahiku kuma-ma ono e hiki hou mai ai.

Oahu: Mission Press.—R. TINKER, Editor.  
E. O. HALL, Printer.